

UDAKO EUSKAL UNIBERTSITATEA

JOXE AZURMENDIK UEU-REN SORTZAILEARI BURUZKO SARRERA HITZALDIA EGIN ZUEN

Santamariaren pentsamenduak ireki du aurten Iruñeko UEU

■ UEUko Iruñeko ikastaroak atzo hasi ziren. Joxe Azurmendi filosofoak Jose Maria Rodriguez Otxoa Nafarroako Gobernuko Hizkuntz Politikako buruaren eta Mikel Aizpuru zuzendariaren laguntza izan zuen Karlos Santamariak hasiera hitzaldia egiteko.

Juan Kruz Lakasta / Iruñea

KARLOS SANTAMARIAREN pentsamendu pertsonalistak eman zien hasiera atzo eguerdiko hamabietan aurtengo UEUko Iruñeko ikastaroei, Joxe Azurmendi filosofoaren eskutik. Azurmendik ordubetez Santamariaren gogoeten garaia deskribatu, eta pentsalari gipuzkoarrak zer-nolako testuingururi erantzun nahi izan dion azaldu zuen.

Santamaria Santo Tomas lizeoaren sortzaileetako bat izan da, Lekuona saria jaso du, hamaika urtetan zehar *El Diario Vasco* egunkarian zutabea idatzi du, Parisen Nazioarteko Pax Christi erakundeko idazkaria izan da, *Jakin* aldizkariako zuzendaritza taldeko partaidea izan da, *Argia* eta EGUNKARIA argitalpenen sortzaileen artean egon da, alemanez, gaztelaniaz, frantsesez eta euskaraz 800 artikulutik gora karrikaratu ditu, lau liburu idatzi ditu, hainbat hitzaurre egin ditu eta abar.

Kurrikulum luzea da Santamariarena, baina Azurmendik adierazi zuenez, «hala eta guztiz ere gazteen artean ezezaguna da, nolabait transmisioak huts egin duelako». Arazoa konpontzeko xedeak bultzatuta, azken bost urteotan zehar Azurmendik beste zenbait ikerlerek in batera lan mardula egin du Santamariaren lana biltzeko, eta jada zortzi bat liburukitan banatutako argitalpena prestatu du. Halaber, bere pentsamendua bilduko duten beste hiru liburuki prestatzen ari da gaur egun, eta horiek guztiak aurki karrikartzeko itxaropena du.

Gerra osteko pentsamendua • Azurmendik azaldu zuenez, Santamariaren pentsamendua batez ere Euskal Herrian eta Espainiako gerra zibilaren ondoren garatu da. Azurmendiren aburuz, pentsamendu horren garrantzia hiru mailatan bana daiteke. Lehenik eta behin, Euskal Herrian inportantzia handia izan du, eta besteak beste euskal munduan hainbat gauza sortu ditu: UEU, ikastolen elkarte, Santo Tomas lizeoa, *Argia* eta EGUNKARIA.

Bigarrenik, Espainian Santamariaren pentsamenduak leihoa ireki omen zuen. «Jose Luis Arangurenek esaten duen bezala, gerra ostean Espainia Albania bezalakoa zen, itxia, eta Santa-



Jose Maria Rodriguez Otxoa, Mikel Aizpuru eta Joxe Azurmendi Udaiko Unibertsitatean.

JOXE

maria hori gainditzin lehena izan zen, pentsamendu pixka bat liberalagoa ekarri». Azkenik, Europar Europa batuaren ideia garatzeko laboratoriora asmatu zuen Santamariak. «XIX. mendearen amaiera eta XX. mendearen lehen erdia estatu nazionalismo amorratuaren garaia da, gerra garaia. Hori gainditu beharrraren ideia II. mundu gerra izan

eta gero sortu zen. Erromako Hitzarmenean, esate baterako, parte hartu zuten guztiok Santamariaren ezagunak ziren».

Santamariaren pertsonalismoa gerra osteko marxismoaren eta existentzialismoaren garaikidea da. Azurmendiren hitzetan, pertsonalismoa «heriotzaren, hondamendi sozialen eta bizitzaren zentzugabetasunaren

meditazioa da». Gauzak horrela, «ez da ezer berririk, baizik eta kultura guztietan izan den gizakiaren bizitzaren eta tragediaren meditazioa». Hori guztia hiru mailatan aztertzen du pertsonalismoak, hiru galdera nagusiren inguruan: Zerk ematen dio balioa bizitzari? Zein zentzu dauka historiari? Zein da heriotzaren arrazoiak?

300 irakasle, 600 ikasle eta 1.000 ordu

OHITURARI jarraiki, Sanferminak amaitu bezain pronto Udaiko Euskal Unibertsitatea hasi da Iruñeko Larraona ikastetxean. Aurten orotara 300 hizlari-irakasle hartuko dute parte Nafarroako hiriburuko ikastaroetan, hizlariok 1.000 ikastordu eskainiko dituzte, eta ordu horietan guztietan ikasle izateko 600 lagunek eman dute izena orain arte. Dena dela, oso litekeena da ikasle kopuruak gora egitea. Beti izaten dira matrikula egiteko azken unera arte itxaroben dutenak, eta hainbat ikastaro ez dira

heldu den astelehenera arte hasiko. Bi aste iraungo du Iruñeko UEUk, hilaren 27ra arte. Ikastaro gehienek astebete irauten dute. Estreinako aste honetan honako ikastaro hauek egingen dituzte: arkitektura, historia eta pedagogia, informatika, literatur itzulpena, matematika, osasuna, soziologia eta Web orrialdeari buruzkoa. Bigarren astean, berriz, honako ikastaro hauek izanen dira: administrazio hizkera, antropologia, bertsolaritza, ekonomia, filosofia, historia, itzulpen juridikoa, kultura kla-

sikoa, linguistika, pedagogia, sexualitatea eta zuzenbidea. Bestalde, ikastaro batzuek 15 egun iraunen dute: antzerkigintza, fisika, glotodidaktika, musika, natur zintziak, psikologia eta soziolinguistika. Ikastaro guztien artean aipagarrienak dira Web orrialdeari, arkitekturari eta administrazio hizkuntzari buruzkoak, aurten estreinakoz jorratuko baitira gai horiek UEUk. Urtero bezala, ikastaroez landa datozen bi asteotan ekitaldi osagarriak izanen dira Larraona ikastetxean.

Arratsaldero zazpietan mahai-inguruak eta hitzaldiak izanen dira. Horretaz gain, gauero ekitaldi kulturalak izanen dira. Atzo Bernandor Atxagaren irakurketa poetikoa izan zen, gaur Maixa, Itziar eta Garbiñeren musika izanen da entzungai, bihar Bederen I taldeak *Zu(t)gabe* obra taularatu du, hilaren 24an Maialen Lujanbio eta Igela bandaren bertso paperez gozatu ahal izanen da, 25ean *Atlantic City* pantailaratu du, eta 26an Trikitrake taldearen musika entzun ahal izanen da. X

Seaskak lizeoko ikasleen sartzea gela egokietan egitea ziurtatu nahi du

■ *Filipe Goietxe*
Seaskako lehendakariak espero du aterabide atsegingarria aurkitzea

Lutxi Fourcade / Baiona

ERNETASUNA eskatu zuen Filipe Goietxek, Seaskako lehendakariak, lizeoko 1996. urteko sartzearen arazoa osoki trenkatu arte. Izan ere, aurrerapenak zabaldu, zabaldu diren arren joan den astean, honen inguruan sustengua ekarri duten pertsona guztiei eskatu zien mobiliza daitezen. «Gostarik gosta, 80 ikasleren sartzea behar bezalakoa gela egokietan egiten dela segurtatu behar dugu», azpimarratu zuen Goietxek.

Alta bada, ez da dudarik joan den astean baino onargarriago agertzeko arrazoiak badituztela Seaskako arduradunek. Uztailaren 5eko protestaldiaren ondotik, Baiona-Angelu-Miarritze distrituko lehendakariak behin-behineko aterabidea proposatu zion Seaska Iparraldeko ikastolen elkarteari: Baionako CCI Merkataritza eta Industria Ganbarak dituen gela huts batzuetan jartzea lizeoa bi urterako. «Proposamen horren eginkortasun teknikoa aztertu dute lizeoko arduradunek, eta toki horretan lizeo baten kokatze proposamen egokienetarik ez bada ere, proiektu horren inguruko adostasuna eman dugu», oroitu du Seaskako lehendakariak.

Alabaina, lizeo baten bizirako beharrezkoak diren antolaketa batzuen obratzeko eskatu dituzte, hala nola laboratoriora gela, jostalekua eta abar.

Orain erabakia BAM distrituko, Baionako eta CCiko arduradunen eskuetan da eta proiektu honen diru mailako arloa ikertzen ari dira (antolaketen kostua, etxe saria). «Aste honetan proiektua baieztatuko da, alde batetik distritua engeiatzen bada behar diren antolaketen obratzera, eta bestaldetik hiru egiturak heltzen badira finantza mailako adostasun batera», azaldu zuen Goietxek. Seaskako Administrazio Kontseilua distrituko lehendakariarengandik erantzun baten zain dago ostegun honetako, egun horretan egingo den bileran dossier honi emango zaion segidaren aztertze.

Lizeoko gerla piztu zen joan den ekainaren 21ean distrituak uko egin zionean Rouseau kolejoa Seaskaren eskuetan uzteari bigarren lizeoa irekitzeko. Berehala, ehunka lagun bildu ziren distrituaren egoitzaren aurrean beren haserre adierazteko, eta beste aterabide bat bilatu zuen distrituak. X